

## REGIONAL NEWS

HEADLINES:-

1. Chief Minister Pu Lalduhoman kalphung thar, mipui sawrkar din kawngah sawrkar hnathawkte chu sawrkar inngahna ruhrel an ni a ti.
2. Mizoram Chief Information Commissioner, Pu John Neihlaia chuan dan hmanga langtlang taka rorel a nih theihnan Local Council te an pawimawhna hle a ti.
3. Vawiin tlai khan Union Cabinet chu a hmasaber atan an thukhawm
4. Narendra Modia chuan a tum thum nana Prime Minister a nih hnuah vawiin khan PM-Kisan Samman Nidhi instalment 17-na pekchhuah phalna a ti chhuak.

&lt;&gt;&lt;&gt;&lt;&gt;

CM

Chief Minister Pu Lalduhoman kalphung thar, mipui sawrkar din kawngah sawrkar hnathawkte chu sawrkar inngahna ruhrel an ni.

Vawiin khan Chief Minister Pu Lalduhoma hovin Minister te, Advisers to CM te leh Mizoram sawrkara Jt. Director chin chunglam zawng zawng leh DC leh SP zawng zawng te telna Inter Departmental Meeting Dawrpui Multi Purpose Hall ah neih a ni a, he hunah hian thusawiin Chief Minister chuan tuna an kal mek dan aia tha zawk kal dan tur hria an awm phawt chuan ziakin a hnenah thlen se a ti a. Mizoram First tih chu an thupui a ni a, thil tha lo hnawl ngam, a tul huna "No" ti ngam an mamawh a ti.

An sawrkar chuan mipuite aw ngaihthlak zel a duh avangin "Mipui Aw" online an nei a; CM office atangin an vil reng a, a mawhphurtuten tha takin kalpui se a ti a. Eirukna tihbo an duh a, sawrkar hnathawk leh consultancy firm inthural te, supplier thurualpui neih te eirukna bul a ni fo a, an khauh hle dawn, a ti a. Sawrkar hnathawkten Annual Property Returns a hun takah file ngei ngei tur a ni a, a tel lovin vigilance clearance an pe dawn lo a ti bawk a. Hnathawh quality tha chauh neih an tum avangin Project Monitoring Committee chak tak an nei a, officer zawng zawng ten tha takin an thawhpui a ngai a ni a ti.

Departmental work reng reng a changtu Minister phalna la hmasa lova thawh phal a ni lo tih Chief Minister chuan a sawi a. Department ten eng project pawh kalpui tum se Planning leh Finance department kaltlang lova proposal thehluh phal a ni lo a. K deposit ah pawisa dah a tam em em a, kum 3 leh a aia upa k deposit reng reng department ten ching fel thuai turin an duh tih a sawi bawk.

Sawrkar hnathawk semrual dan pawh an dap mek tih Pu Lalduhoma chuan a sawi a, allocation of business pawh siam that an tum a. Service inepna nasa lutuk chuan thawhhona a tichhe nasain an hria tih a sawi a ni.

He hunah hian Chief Secy Dr. Renu Sharma, chuan Sawrkar thar duhdan leh hmalakna te, a ruahmanna tlangpui te a sawi a. Sawrkar hnathawk kal tura beisei te tha takin an kal tih a sawi bawk a ni.

&lt;&gt;&lt;&gt;&lt;&gt;

CIC

Mizoram Chief Information Commissioner, Pu John Neihlaia chuan dan hmanga langtlang taka rorel a nih theihna atan veng tin a Local Council ten pawimawhna nasa tak an nei, a ti.

He thu hi vawiina Aizawl Vanapa Hall-a Mizoram Information Commission-in Local Council-te pual a RTI Act 2005 leh The Mizoram RTI Rules inzirtirna huna buatsaih ah sawiin Chief Information Commissioner chuan Local Council-te chu veng mipui thlan tlin, mi puitling tak, vengchung mipuite'n harstana an neih a an tluk luh thin na an nih thu a sawi a, veng tin a Local Council Chairman leh khaw tin a Village Council President-te chu RTI hnuiaia State Public Information Officer-atan kum 2023 August thlaa sorkar thuchhuakin a nem ngheh thu leh Municipal Commissioner bakah district tin a DLAO te chu a khaikhawmtu an nih thu a sawi.

Pu John Neihlaia chuan RTI dan chu khawvel huap ang pawh a dan tha pawl tak a nih thu te leh India rama RTI dan zam a nih theihna atan mi thahnem ngai tak takten chaw an nghei mai bakah nawrhna an huaihawt thu te a sawi a, India ram chu British dan zam rochun zel ram a nih angin sorkar kalphung pawh a mi nawlpui tan hriat a harsat thin thu leh chung dan awm sa te chu RTI-in nasa taka a rawn thiah thu a sawi.

Mizoram Information Commission hi kum 2006 June thla a din a ni a, thawktu 30 an awm mek a, Kum 2006 June thla atanga kumin kum 2024 June ni 7 thlenga RTI dan hmanga zawhna 30069 a awm thu leh complaint 464 a awm a, Online kaltlanga RTI zawhna pawh kum 2022 July thla atanga India rama a pariatna atan Mizoram Information Commission-in a tlangzarh a ni.

He hunah hian, Information Commissioner Pu Mangjangam Touthang leh Mizoram Information Commission Secretary Pu H. Dolianbuaia pawh an tel a ni.

<><><>

#### AMC OPP PRESS CONF

Aizawl Municipal Corporation-a eptu party Corporator-te chuan AMC-a rorel lai MNF Sorkar chu rorel tlak a an ngaih loh thu an sawi.

He thu hi vawiina Aizawl Press Club-a chanchinbu mite an kawmna ah ZPM leh Congress Corporator te chuan AMC-a MNF Sorkar chu cheng vaibelchhe hnih chuang man khawl hman tlak loh leiah an puh a, kum 2023-2024 a AMC budget pumpui atangin AMC-in a thawhchhuah ve tur chu za a 10 a nih thu an tarlan bakah za a 90 vel chu 15th Finance Commission hnuaiia Urban Local Body grant leh Mizoram Sorkar atanga grant in aid lo kal a nih thu an sawi a, AMC-in sum a thawhchhuah belh a, a intodelh ve theihna tur lam ngaihtuah a, hmalam hun atana inruahman aiin thil te tham te te a party mi leh sa invulh a induhsak an thlang zawk an ti bawk.

Eptu lam Corporator-te chuan kum 2021 atanga kum 2024 chhunga party mi leh sa invulhna atana hna te reuh te te an pek chhuah zat chu a sumin cheng vbc 30 nuai 92 sing 3 & 2,050 ni a an tarlan bakah Aizawl mipuiten AMC an dawr zinna ber - in sak, lei laih leh dawr hawn dilna te chu a thang rei thin tih sawiin, Solid Waste Management Centre, Tuirial-a bawlhhlawh inchhek khawm tam lutuk tih ziaawm na atana Mizoram Sorkar atanga an dawn, cheng vaibelchhe 2.74 atanga bawlhhlawh hal ralna khawl Hyderabad atanga an lei chu bun a nih atanga mumal taka hna a thawh theih loh nghal thu an sawi a, AMC budget-ah property tax hmuh zat tarlan thin a nih laiin, a hmanna lam tarlan a nih ngai loh thu leh Aizawl mipuite sum thawhkhawm property tax chu a hmanna kimchang mipuiten an hriat ngei a tul thu an sawi bawk.

<><><>

#### MIZORAM BJP

Mizoram BJP President Pu Vanlalhmuaka chuan Sorkar laipui a BJP sorkar thar chu kum nga chhungin anmahni thlawptu te nena chak takin ro an rel ang a ti.

Aksahvani News Aizawl zawhna chhangin Pu Vanlalhmuaka chuan, Mizoram sorkarin Sorkar laipui a dawr thiam leh thiam loh a zirin Mizoram tan sorkar laipui chu a tangkai thei a ni tih a sawi a, Mizoram sorkarin State danga tual to party ten Sorkar laipui an thawhpui a hma an sawn pui mek angin Sawrkar laipui chu thiam taka Mizoram tan a tangkai turin thawh pui thiam se a duh thu leh NDA neitu chu BJP a nih thu chiang taka hre thiam tura Mizoram sorkar inhawng tura a duh thu a sawi.

Pu Vanlalhmuaka chuan BJP chu an in hawn reng thu leh Mizoram BJP chu Mizoram, Mizo hnam leh Mizote mamawhna ang a thawk tura awm an nih thu a sawi bawk.

Pu Vanlalhmuaka hi nimin tlai a Prime Minister Narendra Modi lakluhna inkhawm New Delhi-a neih ah Siaha Bialtu MLA Dr. K Beichhua, Palak Bialtu MLA Pu K. Hramo leh Mizoram BJP hruaitu te nen an tel a ni.

<><><>

## LUNGLEI : HEROIN SEIZED

Lunglei Excise & Narcotics Department chuan kumin January atanga June ni 10 thlenga Heroin No 4 an man tawh Kg 2 leh a chanve chuang chu Lunglei a Excise department awm chinah Heroin man tam ber record a ni, an ti.

Lunglei-a Excise and Narcotics Asst Commissioner Pu Ngurchhuana chuan Lungleia Excise Department a awm hnuah kumkhat chungin Heroin Kg 2 man tlin a la awm ngai loh laiin kumin chung bikah ringawt Kg 2 leh a chanve an man tawh thu a sawi a, Heroin an man theihna tura kawng hrang hranga thawhpui thin tute leh rim taka thawk thin Staff te chungah lawm thu a sawi.

Excise & Narcotics Department Asst Commissioner chuan March atanga May thla chung ringawt a Lunglei Excise & Narcotics Department ten an man pawh tunlai Lunglei tualchung hralhna ang a chhutin Cheng Nuai 60 chuang man a tlin tawh thu leh Heroin No 4 hi a tam avangin tunlai hian Lunglei tualchung an hralhna rate chu a tlahniam hlek nia an hriat thu a sawi bawka. Heroin hawng khat Cheng Sing 3 a hralh thin chu Sing 2, Sang 8 vela a tlahniam nia an hriat thu a sawi bawka. May thla liam ta bikah Heroin gram 461.912, Ganja Gram 1234.93, Rakzu litres 368.100, Zu bilh lai Tin 1, Yeast Gram 273.8, Sapzu um puitling 3 leh lirthei 5 te an man tih sawiin MLP Act hnuai thubuai 47 ziah luh a nih thu leh hemi kaihnawihah mihring 42 an man bakah ND&PS Act hnuai thubuai 13 zia klutin mihring 13 man an nih thu a sawi bawka.

<><><>

## 1<sup>ST</sup> CABINET

Vawin tlai khan Union Cabinet hmasa ber an thukhawm. Puan tawh angina Prime Minister Narendra Modia chu nizan khan a term thum nan rinawmna thutiam tira lakluh a ni a.

Rastrapati Bhavan-a lakluh inkhawmah President Draupadi Murmu chuan Prime Minister Modia hi rinawmna thutiamtirnin a lalut a. Prime Minister rual hian Council of Ministers lakluh tel an ni a. Cabinet Minister 31, Minister of State (independent charge) panga leh Minister of state 36 lakluh an ni.

BJP hruaitu senior zingah Rajnath Singh, Amit Shah, Nitin Gadkari, Dr S Jaishankar, Piyush Goyal, Dharmendra Pradhan, Nirmala Sitharaman leh BJP President J P Nadda te chu Cabinet Minister atana lakluh zingah an tel a. Anni bakah hian Kiren Rijiu, Pralhad Joshi, Giriraj Singh, Ashwini Vaishnav, Jyotiraditya Scindia, Bhupender Yadav, Gajendra Singh Shekhawat, Annapurna Devi, Hardeep Singh Puri, Dr Mansukh Mandaviya, G Kishen Reddy leh C R Patil, Dr Virendra Kumar leh Jual Oram te cabinet Minister atan lakluh an ni bawka. Madhya Pradesh State Chief Minister hlui Shivraj Singh Chouhan, Haryana Chief Minister hlui Manohar Lal Khattar leh Assam Chief Minister hlui Sarbanand Sonowal te pawh Cabinet Minister tura lakluh an ni a. Hei bakah hian Karnataka Chief Minister hlui leh JD(S) MP H.D. Kumaraswamy, Bihar Chief Minister hlui leh HAM party chief Jiten Ram Manjhi, JD(U) MP Rajiv Ranjan Singh, TDP MP Kinjarapu Ram Mohan Naidu leh LJP (Ramvilas) Chief Chirag Paswan te pawh cabinet minister-a lakluh zingah an tel a. BJP leader Rao Inderjit Singh, Dr Jitendra Singh leh Arjun Ram Meghwal bakah Shiv Sena atangin Prataprao Jadhav leh RLD Chief Jayant Chaudhary te Ministers of State (Independent Charge) rinawmna thutiam tira lakluh an ni bawka.

Minister of state 36 lakluh zingah BJP MP Jitin Prasad, Shripad Yesso Naik, Pankaj Chaudhary, Nityanad Rai, Krishan Pal, V Somanna, S P Singh Baghel leh Shobha Karandlaje, Suresh Gopi, Raksha Khadse, Ajya Tamta, Bandi Sanjay Kumar, Kamlesh Paswan, Harsh Malhotra, Satish Dubey leh Ravneet Singh Bittu bakah RPI hruaitu Ramdas Athawale, JD (U) hruaitu Ramanth Thakur, Apna Dal (S) Anupriya Patel leh TDP hruaitu Dr. Pemmasani Chandrasekhar te an tel a ni.

<><><>

## BYE-ELECTION

Election Commission chuan State pasarih-a Assembly bial 13-a bye-election neih hun atan July ni 10 a ruat. Inthlanna turte hi West Bengal-ah bial li, Himachal Pradesh ah seat 3, Uttarakhand ah seat 2 leh Bihar, Tamil Nadu, Madhya Pradesh leh Punjab ah seat 1 theuh a ni a. Inthlana vote tla te hi July ni 13 ah chhiar a ni ang.

## PM-KISAN

Narendra Modia chuan a tum thum nana Prime Minister a nih hnuah vawiin khan PM-Kisan Samman Nidhi instalment 17-na pekchhuah phalna a ti chhuak. Loneitu vaibelchhe 9 leh nuai 30 chuangin hlawkna an tel dawn a. Pu Modia chuan a sawrkar thara a thutlukna hmasa ber chuan loneitute hamthatna a ngaihpawimawh zia a tilang a ti a. Pu Modia chuan a sawrkarin loneitute leh agriculture sector-a eizawngte a ngaihsak zel dawn a ni a ti.

PM-KISAN hi kum 2019 khan tan niin loneitute sum lakluh tipung tura hmalakna ani a. He scheme hnuai hian loneitute hnenah kumkhat chungin cheng sang ruk zel pek thin a ni.

<><><>